

## Integralni tekst<sup>1</sup>

# ZAKON O IMPLEMENTACIJI ODLUKE KOMISIJE ZA ZAŠTITU NACIONALNIH SPOMENIKA IZ ANEKSA 8.

## Svrha Zakona

### Član 1.

Ovaj Zakon o implementaciji odluke Komisije za zaštitu nacionalnih spomenika iz Aneksa 8. (u daljem tekstu: Zakon) utvrđuje mjere zaštite i obnove dobara koja su utvrđena kao nacionalni spomenici Bosne i Hercegovine odlukom Komisije za zaštitu nacionalnih spomenika, uspostavljene u skladu sa Aneksom 8. Općeg okvirnog sporazuma za mir u Bosni i Hercegovini ( u daljem tekstu: Komisija).

### Član 2.

Odredbe drugih zakona i propisa neće se primjenjivati ako su u suprotnosti sa ovim Zakonom.

## Definicije pojmova

### Član 3.

Pojmovi koji se koriste u ovom Zakonu imaju sljedeće značenje:

-“Nacionalni spomenik” predstavlja dobro koje je Komisija utvrdila kao nacionalni spomenik Bosne i Hercegovine u skladu sa članom 5. Aneksa 8. Općeg okvirnog sporazuma za mir u Bosni i Hercegovini (“Aneks 8”). Sve odredbe Zakona koje se primjenjuju na nacionalne spomenike primjenjivat će se i na dobra koja su upisana na “Privremenu listu nacionalnih spomenika”, u prilogu, sve do donošenja konačne odluke Komisije u vezi sa predmetnim nacionalnim spomenikom u skladu sa članom 5. stav 4. Aneksa 8;

-“Odjel” se odnosi na Odjel za prostorno planiranje i imovinsko-pravne poslove Vlade Brčko distrikta Bosne i Hercegovine;

-“Obnova nacionalnog spomenika BiH” odnosi se na vraćanje oštećenog ili uništenog dobra u stanje u kojem je to dobro bilo prije njegovog uništenja do razumno moguće mjere uključujući i ponovnu izgradnju nacionalnog spomenika, na istom mjestu i u istom obliku, istih dimenzija i od istog materijala kao što je bilo i prije rušenja, uz korištenje iste tehnologije građenja kad je to razumno moguće.

---

<sup>1</sup> Ovaj integralni tekst sadrži osnovni tekst Zakona i sve njegove izmjene i dopune (“Službeni glasnik Brčko distrikta BiH”, br. 2/02 i 19/07). Integralni tekst se koristi samo za internu upotrebu i na njega se ne može pozivati prilikom službene upotrebe.

## **Zaštita nacionalnog spomenika koje je utvrdila Komisija u skladu sa Aneksom 8.**

### **Član 4.**

Podrazumjeva se da nacionalni spomenici uživaju najveći stepen zaštite prema zakonima Brčko distrikta Bosne i Hercegovine (u daljem tekstu: Distrikt).

### **Član 5.**

Nadležna tijela i institucije Distrikta će sprječavati i suzdržavati se od poduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu i obnovu.

## **Odobrenja koja se tiču nacionalnih spomenika**

### **Član 6.**

Sva odobrenja za zaštitu, konzervaciju, prezentaciju i obnovu nacionalnih spomenika izdaje Odjel.

### **Član 7.**

(1) Odjel je dužan izdati odobrenje iz prethodnog člana u roku 30 dana od podnošenja zahtjeva.

(2) Zahtjev iz prethodnog stava ovog člana sadrži sve priloge koji su navedeni u članu 11. ovog Zakona.

### **Član 8.**

(1) U postupku izdavanja odobrenja u smislu ovog Zakona primjenjuju se odredbe Zakona o upravnom postupku, ako ovim Zakonom nije drugačije propisano.

(2) Odluke koje donose Odjel u skladu sa ovim Zakonom su konačne.

### **Član 9.**

Odluke koje su u suprotnosti sa odredbama ovog Zakona ništavne su.

### **Član 10.**

Svi planovi prostornog uređenja izrađeni suprotno odredbama ovog Zakona ne primjenjuju se na zaštićeni prostor nacionalnih spomenika.

### **Član 11.**

Uz zahtjev za izdavanje odobrenja za obnovu, podnosilac zahtjeva dužan je priložiti izvod iz katastarskog plana, dokaz o vlasništvu ili pravu korištenja zemljišta, objekta ili kompleksa, historijski i graditeljski opis izvornog stanja objekta ili

kompleksa sa postojećom arhitekcijskom, fotografskom i drugom dokumentacijom, opis sadašnjeg stanja objekta ili kompleksa i projekta obnove objekta ili kompleksa. Zahtjev za obnovu objekata koji su potpuno uništeni uključujući i prijedlog glavnog projekta.

#### Član 12.

U slučaju kad ne postoji dokumentacija na osnovi koje je moguće izvesti obnovu potpuno uništenih spomenika, u skladu sa odredbama člana 11. ovog Zakona, može se tražiti od Komisije da dostavi kriterije na osnovi kojih će se izdati odobrenje.

### **Obaveza prema Aneksu 8.**

#### Član 13.

(1) Distrikt će uložiti sve dodatne napore da poduzme odgovarajuće pravne, naučne, tehničke, administrativne i finansijske mjere neophodne za zaštitu, konzervaciju, prezentaciju i obnovu nacionalnih spomenika.

(2) Odjel može osigurati mjere iz prethodnog stava ovog člana putem instrukcija.

### **Obaveza saradnje**

#### Član 14.

Službenici, tijela i institucije Distrikta će u potpunosti sarađivati sa Komisijom.

#### Član 15.

Službenici, tijela i institucije Distrikta će u potpunosti sarađivati sa Odjelom i na njegov zahtjev osigurati mu svu relevantnu dokumentaciju.

#### Član 16.

Službenici, tijela i institucije Distrikta će u roku od 15 dana od stupanja na snagu ovog Zakona proslijediti Odjelu zahtjeve koji su u postupku, a koji se odnose na nacionalne spomenike.

### **Nadgledanje i stupanje na snagu**

#### Član 17.

Nadzor nad provođenjem ovog Zakona vršit će Odjel.

Član 18.

Inspekcijski nadzor bit će vođen u skladu sa Zakonom o prostornom uređenju.

Član 19.

Ovaj Zakon stupa na snagu osmog dana od dana objavljivanja u “Službenom glasniku Brčko distrikta Bosne i Hercegovine”.